


甲
乙
雜
著





著 雜 乙 甲

著 肩 孫

王雲五主編

叢書集成初編

甲 乙 雜 箸

中華民國二十五年十二月初版

朱

著 者

孫

肩

發行人

王

上海河南路
雲

五

印刷所

商務

上海河南路
印書館

發行所

商務

上海及各埠
印書館

甲乙雜著

稿李孫肩著

告城隍文

某爲僧一十六載。馬齒知非。內疚日增。外火沍至。旣絕生趣。惟有死門。莫由告訴。瀝血抒衷。敬詞於城隍之神曰。某聞死生有命。子夏曾聞。問事鬼神。夫子不告。然漢文徵宣室之談。毫髮不爽。周王感內史之對。禍福無移。造物於人。自有默定。能生能死。則神明能獨宰也。某七齡背母。十一歲棄父。怙恃之恩。早失。蓼莪之痛。鮮知。伶仃茹毒。躑躅艱行。童時館外家。及長失師訓。上不型典謨遺範。下不窺先德名言。游弈自墮。玩物自喪。濫廁庠序。實忝章句。賴皇朝沐浴之深。藉祖禰清白之貽。知忠孝節義所在。心腹腎腸可敷。雖翼思躍。鵬志欲搏。恭值大行崇禎皇帝季年。五斗外亂。三韓□□。下漢武賢良之詔。效毛遂處囊之錐。尤悔干祿。天爵靡從。亡何運遘陽九。鼎沸莫攀。已覆前車。猶繼後轍。徧天下□□。而儼一僧儀。自視力不足。哭秦目能戴。吳嗟非西山。誰憐東海。一十六年之閒。枳橘之方易處。薏苡之謗頻興。自謂大塞朋來。無復可干酒食。靈輟絕望。趙宣淮陰久虛漂母。販鴛難逢伯樂。爨木不遇中郎。骨肉貧而竄寄。朋友賤而見疏。虎狼有仁。人心山澤。返服恥同。類涉川久恨無徒。彼何人斯。通塗曷之往。舉世莫之信。天壤之閒。奚生此人。天之所廢。不可支也。某又聞之。往因來果。佛教所明。前作今受人倫咸奉。使他日有被浮名得。曰橫目望賜。迴日之戈。讀進履之書。攻克伏戎。有命承家。方袍□見官儀。慧劍報同國士。儻白首無成。幽

情尙繫。望制命短長。終朝三褫。或乘白驥而來。或從烏江而逝。不求羊祜金環。敢希都中蟲火。虞悝願爲忠義之鬼。某願如之。不得爲人。或爲濟陽之鳳。或稱一角之麟。同現河清之日。郭景純自知命盡。陶彭澤自作祭文。某早知有此事也。冒干神聽。亟敕耑行。某叩首叩首。待命之至。瀝血爲文。上疏。

告兩府君文

爲僧不孝兒某。上達大參勳卿兩府君祠下。兒百拜百拜。泣血謹言。王修七歲喪母。感鄉里罷社。兒時育於庶母。嬉戲恆若。邴原十一歲成孤。感鄰師授業。兒時訓於外傳。志學不能。幼愧古人。兒不如死也。舞鏡而歸。仲謀勸婚。年已十七矣。執經罔就。次學蔑聞。家聲映雪。亦聞囊螢。曾不能拾芥紆青。乃爲銅臭資郎。壯愧古人。兒不如死也。年及知命。不顧室家。妻息飄零。戚友擯棄。猶發劉琨祖逖之憤。效李康劉峻之言。視陶朱貨殖之營。陶潛詩酒之娛。何其遐哉。老愧古人。兒不如死也。又甲乙之變。讎恨均天。菜傭蹙踊。碎首乞丐。賦詩投冷。以不事王侯爲高尚。以託跡空門爲肥遯。不能同塗。戊子以來。諸君子之膏。見天下忠臣義士。蒙首未遑。兒可生乎。爲僧一十六年。一衲已敝。一磬已懸。羅睺亦爲墮鉢。何充乃復借金。巧媳難炊。無米墜甑。豈肯回眸。兒可生乎。程嬰不負杵臼。千古之有孤也。山濤不負嵇康。千古之有友也。六尺之孤。雖存寢邱之戶。未封縱有楚王術。無優孟反躬自責。尙可爲易。兒可生乎。嗚呼。兒進不能佐三尺之功。退不能盡一死之節。君讎不報。父恩不酬。養子不教。撫孤不忠。五倫已絕。況有三不如死。三不可生。仰愧則夏日毛寒。俯怍則冬月汗注。早隨膝下於九泉。勝生□世於一刻。兒某百拜百拜。泣血謹言。

乞食文

五十不知非。六十猶未化。鳥寄一枝。蛩鳴四壁。谿無明月。僧掩殘經。墮甌誰識。孟生黔突。久同墨子。夜宿則寒。蟬吸露。曉立則霜。竹餐煙。慟哭朱公。始悲歧路。受知鮑叔。已在天涯。衰柳增十圍之嘆。荒畦泣西山之歌。擬投步兵。狂無阮籍。敢希執炙。終報顧榮。秦穆公不靳一馬。得解環車。趙宣子能施一飯。不忘倒載。酒食不敢困。恩德不敢孤。吳均有移文。孔融有禁論。故慕何次道之高風。勿令劉公榮之獨醒。

胡濤公詩序

余與先生交三十餘年。海內論交者。莫我兩人。余學詩者也。非能詩。莫交。先生能詩者也。非善學詩。亦莫交。余兩人交如是。昔人論詩之作。靜若高山。動若浮雲。素如秋蓬。藻如春葩。先生之詩。更多骨。多慷慨。多東方漫世之言。多南阮白眼之態。雖不近於人。而人多爭與交。別來三十年中。所過名山大川。山水爲之調響。雲月爲之朗和。揚舲飛蓋。邈若姑射。頃來嘉禾。尋三十年故交。余爲僧二十年矣。相對嗟吁。乃出近藁。庶詠余越人也。先生楚人也。曾聞陳軫之言乎。況余抱莊舄之病。更深能作楚音哉。非敢謝不敏也。先生曰噫。果越人之聲也。

矮翁小傳

矮翁。浙西秀州人也。世爲明顯。乙酉出家。年三十四歲。慕長汀子爲人。放浪不羈。絕口不言世事。逢人但合掌念佛。結屋南湖之南。梅谿之墟。友人題詩。風顛掣盡。恣優游。結卻從前布袋頭。一笑滄桑驚世晚秀。

州翻作古明州。後過昭陽受法。記荊吳太師贈詩。割宅菴居謝愛憎。風流嘯咏一枯籐。梅谿臥月悠然遠。杖履隨雲自在登。賓主原分臨濟喝。伽梨今付秀州僧。甯知陶令攢眉意。入社聯吟愧未能。行跡迥異。時人莫測。

沈居士孤塚記

嗚呼。此沈居士諱某之孤塚也。嗚呼。居士吳人。幼慕華寶之孝。終身不娶。寓禾。善與人交。慷慨任事。爲人所難。年四十一而終。宗族旣絕。感山陽之信友。遷祖父兩棺同葬。梅谿之乾隅。置贍田五畝。永存梅谿。供稅課。烝祀之費。足慰地下矣。余嘗論天道報施。不於其身。於其子孫。今居士墓門有木。碑石有誄。浮屠氏爲之世守。視世閒生懷徵蘭之慶。死懼伯道之憂。可不一大感慨歟。故爲之記。

賣字說

余年來貧。乃作賣字說。客曰。字可賣乎。何異賣菜傭也。余曰。否否。右軍換鵝。巨山書壁。所處不同也。余十歲而孤。過庭乏訓。長讀遺書。三十不能賣聲名於天下。謀所以善身。偶從華亭陳仲醇先生游。每歎文章品節。盡於字學。出其所蘊。拜而藏之。未幾家遭歲困。遂薄世情。名隸傳燈。慚非素履。腹膺輪扁之喻。退慕老氏之言。塊然獨處。二十餘年。莊生衣履久敝。顏子簞瓢屢空。靡從仁祖之乞。不因比舍之炊。敢蹈闕澤之蹤。甯貽仲將之誚。曹子建云。鹹水之魚。不游於江。淡水之魚。不入於海。固所習也。乃作賣字說。以當募券。客曰。唯唯。

漢壽亭侯讚

道統三教。德並乾坤。九州香火。天下歸仁。力不可回。志不克酬。當年社稷。至今存劉。讚莫能申。庶簡帝心。一腔心事。萬古沈吟。

書生棺銘有序

莊生云。善吾生者。乃所以善吾死也。已陳芻狗。知無可用。牢筴之歲。知無可生。況□憂危。易晞朝露哉。散木速腐。不知其非。豫置空棺。顧影灰心耳。道士以天地爲棺槨。達人以蘆蓀裹屍骸。念之慚愧。勳卿孤子。僧勝名肩。方袍圓顱。窳堵波阡。延陵贏博。平陵要離。汝行我志。子孫其宜。

跋旅塵後

天地亦旅也。萬物亦旅也。此見道之旅也。騰躍數仞。亦旅也。扶搖九萬。亦旅也。此達生之旅也。轍環天下。亦旅也。應聘列國。亦旅也。此聖賢之旅也。迨有人焉。名其居曰旅塵。則又塵垢萬物。陶鑄聖賢者耶。噫。可與把臂入林矣。

跋靜遠居

此後漢武侯語也。武侯躬耕南陽。鼎立西蜀。出處文章大業。盡在乎此。服膺無數。不負其名。

書史後語

不知今古。遇事輒墜。尤僧家之大病也。要知成佛作祖。不離忠孝節義四字。丙午寒食。風雨爲鳴。寤不成。

寐。再一涉獵。以明世閒法。出世閒法。元不兩概。豈青氈爲我家故物也哉。

自擬計語

某遭逢不偶。出處乖違。廁跡僧流。實慚衮影。憂傷久抱。霜露全晞。伯玉知非之年。桑戶反眞之日。於某年某月某日某時。弗疾弗藥而終。嗚呼。箕裘旣墮。忠孝復泯。生死蔑聞。綱常是玷。不望素車遠奔。奚煩生芻密置。遺楮代辭。異路銘感。

掩關謝客語

陋巷久虛結駟之縱。空山已絕好事之跡。斷臂甯堪病骨。折肱敢保遺膚。夫子無言。非關柑口。丁蘭有涕。願學居廬。或駕紫蓋之車。或汎清翰之舟。當知看竹不須主人。何妨持柑自往。

病書客坐語

某身貧道貧。生計日拙。友誼戚誼。交往久疏。年未周甲。形先四渙。兩目昧糠。左耳塞豆。對面每多錯認。高聲時亦誤聞。流火上炎。溼疾下墜。支頤不能運足。捧腕豈便舒毫。凡百君子。祈諸賜鑒。至於范丹有閭里之歌。陸納無茶果之供。已蒙宥外。不在懇中。

歲朝邀同人入社語

某。遯跡僧流。尙淹塵閫。貌非陽貨。不信匡人。服竊叔敖。終欺楚主。舊友騰聲。新交嘲笑。千秋慧業。四始勝集。沽酒能醉陶公。執經當推元度。孔佛同輪。禹稷易地。

題無相長老像後語

余識公於亂離之際。知非浮屠中人。相對久之。各出新亭之淚。短髮直指。怒目銜鬚。真不減魯陽揮戈。舞陽持楯時也。挑竹杖。繫芒屨。高歌曹孟德之詩。余乃和之曰。老驥老驥。何時可還。千里之思。何如西山。西山無薇。與子同飢。西山無蕨。與子同歿。薇兮蕨兮。嗟時之邁矣。每相對引滿。仰天鳴鳴而已。

傳親友分析遺產語 辛卯歲

子公門墻。鬼神能瞰。趙嘉墓碣。風雨自明。飄零一僧。知無還日。伶仃二子。遲歸有時。父不肯堂肯播。母獨茹苦茹荼。豈祖澤之靡遺。實余躬之多戾。尙存一線。謹憑三黨。

答謝某當道書

某聞之。天不私蓋。地不私與。某戴明公之德是也。某失怙遺豎。幼學靡稱。內絕三黨之親。外蔑三益之友。焚焚撫摩外氏。蹶蹶顛沛中年。非同阮籍之悲。實切楊朱之慟。身既爲僧。家如脫屣。久淹白業。幸際朱輪。食鮭難供。相國之醇醪。江樓何當。刺史之臥閣。君子德風。小人懷惠。方寸未失。野性猶舊。顧言貌不足動人。智謀不能自衛。先人一塵。戎馬踐落。神鬼爲泣。風雨爲鳴。更賴明公。恩威並及。情惠兼施。使烏有先生。原無姓氏。梁宋諸生。還有餘金。庭墟不遷。松菊不剪。十年以來。是頂是踵。戴明公之德。譬渤海而俱深。方嵩華而猶重。亟積寒暄。曠延馳驟。背德不祥。相鼠無禮。某知之矣。家存四壁。星散雲行。乳臭二男。東流西播。雲水相依。箕裘已墮。芝蘭每成。枳棘。薏苡可作明珠。復更賴明公。含一之宏。位三之照。盆下有光。不假。

燭火。然猶戰慄。未敢僭函。瞻征雲而結鬱。望葆纛而驚神。言念此私。心難掩護。近探密友。復悉懿親。聞長缺之歌。車魚並錫。聽鈞天之樂。涕淚交流。所以然者。感德彌深。不覺喜極而悲。生於心也。枯骨施澤。西伯莫渝。鮒魚斗水。莊周得治。某始終之託。惟明公是賴焉。伏思廊廟草澤。是難溷率。禪誦之暇。每覽古人拂拭之優蹤。窮士知遇之奇跡。某不知身處溝壑之中。而欲翹雲霄之上也。某頓首頓首。死罪死罪。謹復以申。

遣子謝荅某當道書

某青絀末學。白社狂人。昔賴先人遺緒。備數閭里。十年樹下頭陀。不識山林之趣。更抱柴桑腳疾。聊息溝壑之間。蛩蛩謀無善草。周周計苦銜翼。不圖太陽所歷。陰谷生溫。非從左右先容。豈因羣公後譽。入鑿竈之廢材。藉以揚聲。駕鹽車之驚骨。遇以託跡。仰瞻安石器量。俯鑒有道人倫。慚比支遁高流。何當王公下問。耕桑閒過竹院。煮水共析茶經。道術相忘。形骸頓置。隨顏鈞敕。愛護波深。捧讀瑯函。寵施格外。恩同留玉。報愧銜珠。麋鹿罔識天階。筆札謹憑豚子。

荅婁東某縉紳書

某飄零一衲。自謂不敢望錄。搢紳先生之齒牙。一朝邂逅湖山。得蒙青眼。兼及黃口。白蓮之社。借彭澤遂爲高賢。犂牛之子。遇夫子方稱駢角。何當汝南月旦。難闕通德門牆。曠達以來。未能修刺。非避寒暑。實切病狂。台慈不以不才鳴鼓。自憐舐犢。罪覺負山。詎謂反賜芳函。綢繆益甚。當事得推烏屋。同門更託金蘭。

仁人用心。其利溥哉。佳刻并登。卒成淵藪。歲茲云暮。未報明珠。春羞行潦。少展潔誠。

荅汪搢紳書

風景日非。行業日墜。矯首東山。如瞻西國。桓公有衰柳之悲。庾生有枯樹之歎。情符寤寐。晤比關山。慚愧古人造道之深。抑切今狂無據之蕩。手示漢封閣廢址。雖先人別業。常勝因未舉。方將附搢紳先生之末。勸請白法大師。久住樂成。優孟之談。實無管叔。但本寺諸公。步趨異。故不同其心。本末二致。不一其議。時運乖張。莫能誰何。敢望敦致。勿加睹聞。全厥終始。依賴是幸。

荅何搢紳書

歲月易過。良辰莫遘。憶洞簫激於丹臺。甘醴飫於肺腑。今又西風解葉。鴻雁南征。知己一方。感懷烏已。某獨瓊谿頭。迴絕人事。更不入城市。知徐穉之楊尙懸耳。聞清翰直溯龍江。六朝煙景。寤寐舊遊。不獲從衆賢之末。相隨七子賦詩。效南皮之樂。悵悵何如。奉啓台函。慰悉近履。不棄草澤。覺中秋皓月。千里澄潭。徒懷蟋蟀之鳴而已。使旋遑迫。莫罄所云。秋風旅泊。願珍服食。某頓首遙復。

與屠表姪

年來希晤。自賤辰損惠。坐閒不及細談。隔來又百日矣。目疾時作。豈天不欲使僕看依稀風景耶。聞足下復懸絳帳。不令季長獨美當時。聖學流漓。望爲砥柱。僕十年辛苦。幾死一身。換得一頂僧帽。百苦俱備。同心如足下。能不念僕。近日諸親朋作詩相招。似不諒僕。本不出家。何云還俗。但冠裳與時不同耳。嗟乎。僕

曩不過一納粟銅臭耳。比之甲申一賣菜傭。能不愧殺。十年蹤跡。自知名教中罪人。口誦先聖之書。身被佛氏之服。風人斯詠。宜乎見譏。然思之今日抱罪甘心。又以先人一線是墜。蓼莪泯滅。思之今日抱罪甘心。業已佯狂成癩。雖扁咸不能再起。至愚至不肖。肯以十年僧帽。易此□□哉。十年菜根。易此腥羶哉。佛教先賢原稱異端。復思今日名之曰異端。亦已甘心。昨有客相問。僕荅曰。從來優伶能唱生旦曲者。至老不過走楊花。提傀儡耳。不曾見有能作淨丑者。相與大噓。以足下爲同心之言。一併相及。舊作二紙附教目疾未痊。筆墨潦草。情緒不堪。語不倫次。閱畢焚之。

勸景鴻

嗚呼。爾父生爲余戚。死爲余師。甲乙之變。普天同泣。同一丈夫。嗚呼。爾父慷慨盡節。余實厚顏。淹忽十載。夙夜慚惶。師心在目。余生猶戀一鉢。爾父死。寡母二孤。焚焚何藉。誰爲痛心。世險人危。炎涼莫測。辛卯之秋。以爾託跡空門。嗚呼。豈爲衣食爾哉。蓋有望於爾也。爾思之。爾來六年矣。衣爾。食爾父也。豈衣食爾哉。蓋有望於爾。有望於爾父也。爾思之。今爾年十八矣。爾能爲人。余實報之。爾不能爲人。豈徒無益。嗚呼。皇天后土。實鑒余誠。有譏余以爾同一行童沙彌。是蓄因作是書。勸爾並以自勸。嗚呼。他人豈能窺余哉。蓋亦有望於爾也。父乎父乎。爾能爲人。余甯是譏。爾不能爲人。余亦何俾。爾思之。戒之。勉之。日舒覽之。

示兩兒

大道廢。良心滅。日月崩。五倫絕。人心喜聞人過。喜發人非。未有今日之甚。汝父十年狼狽。跡寄空門。所爲何事。惟知汝祖父一生礪節。表立當時。爲子孫能不痛惜餘風。俾不爲人指背笑詈。夙夜皇皇。惟恐不逮。今年頭顱四十五矣。齒落髮斑。瘡疾三載。日病半年。一身弊衲。蟣蝨盈膚。豈父母遺體之性成哉。蓋不得已也。甲乙之讐。人人不共。忠臣殉節。義士捐軀。惟恐不逮。汝父生不逢辰。淹蹇自棄。上不能爲忠臣。義士下不能與俗狗時。古人飛遜殊塗。今日惟有爲僧。猶衣敝服。豈念祖父書香。儼稱曰釋氏哉。十年心事。無人知之。天地鬼神知之。祖父知之。汝能知之。閏年十八。苟年十六。不爲小矣。忠孝節義。聖賢血脈。略具人形。良心自覺。自唐虞以迄我明。繼世應運。其間順逆邪正。昭昭史冊。炳炳日星。忠孝節義。何代無之。良心不死。不因貴賤。故宰相有宰相忠孝節義。乞丐有乞丐忠孝節義。率土之義。存乎其人。祖父數世衣冠。能不念及。古人有言。聞人過如聞父母名。豈反欲使我成此過耶。他人不知。汝豈不知。向不欲向汝言。今因親友之言。因事論事。不得不言。我生死早置度外。遲速閒耳。浮名猶恥。倘遂我志。得終緇服。雖死猶生。餘喘繩床。亦不過苟延性命。但汝後讀書。要識聖賢之心。聖賢之心。忠孝節義而已。他不具論。閏苟知之。

午日邀宛陵劉居士

介子之淚未收。屈子之淚復流。轉盼芳辰。生何如死。新竹埽雲。赤葵向日。濁酒卮醪。來話苦辛。莫謂對面無敬亭山也。何日烹鷺羹。真當泛桃花潭耳。

與吳危齋

命、夫子罕言、非罕言也、難言也、非難言也、深於言也、季主、君平、公明之徒、直得夫子旨、蓋難言於世、肆言數術、與子言孝、與臣言忠、豈非隱於忠孝、遜於世者也、某尚貪生、徒隱於一鉢、身名何藉、乃敢侈望考終、但有一日得覩白日青天、優游泉石、斯不負指南也、嗟乎、而今而世、誰能造命哉、

又

僕幼既失學、壯亦蹉跎、彭澤有言、本既不豐、老病繼之、若爲僕謂、欲頌高風、惟此爲恨、秋月照兩山、恐有人識韓康、則灞陵山中有待、天涯睽隔、聚首無期、前所贈硯、仍留郎君、以當呂虔佩刀、并命景鴻祖道、

又

手示更悉、吳門之餞、西山之作、僕謂未然、此時霜雪未凝、何山松柏、能後凋也、拙作二紙、未可馳郵中、當蓋棺諸公爲定本、迂見乃爾、諒許同、

又

省示、詢及景鴻尊人、園中紀詠、識語頗末、山濤之淚、與足下共下也、當求所遺相報、兒輩趨庭無日、染俗日深、回首不堪、早識天命、乃辱大譽、非文季之言、倘造物盈虛、事在足下、

荅二勝和尚

積歲曠面、相思爲勞、清風時來、明月時去、若無情也、弟病眼幾盲、如生在腳下、但知可入重泉、修篁數畝、心裏作枯葦、但知烈火日焚、避人如讐、只堪闔戶、正想春華、不慕歲寒、忽承貽我大士像、一瓶甘露、從頂

澆下。魏武有言。能愈我疾所不逮也。敬謝。

荅舊戚

膏肓雲水。骨肉炎涼。同人于野。履虎咥人。所剩一樹。何當快嚼。如過屠門。幸振金玉。以慰施旌。

荅白法尊宿

某敬復妙喜大師座下。漢封故址。先人剏立香火。久矣。俎豆其閒。逮滄桑後。他人雄踞。畏壘之民。亦久苦之。曩因寶閣重興。士大夫請大師主持。黃童白叟。忻忻然有喜色。翹首無量。某亦忻忻然有喜色。翹首無量。遂以漢封故址。爲大師宴息之地。某之計。計寶閣也。某之計。計大師也。功資滌渤。物力溝渠。今且□井。養之泉。而灌溢之。又非河伯望洋之歎比也。詎可以歲月較之哉。大師法臘愈高。品德愈隆。四方瞻之。不日成之。區區一閣奚慮哉。縱大師飄然霞外。其如士大夫之諄懇乎。寶閣一日未成。大師不能安。士大夫一日之心。士大夫一日之心未安。大師不能去。漢封一日。總之寶閣。大師。漢封。無二無三也。士大夫自當合楮同懇。某從本寺諸公合楮同懇。某敬復。

荅故人

某離世十年。抱疾亦十年。自揣不祥之人。甯疏閒問。兩錫手札。施德不使人知。恨古人不見此耳。某浮家泛宅。不知漢魏。豈知有晉。一聽兒輩舉止。但先賢以功名付天命。蹶蹶於斯。甯無敗闕。掩耳勿聞。勿煩神思。愛我知我。

荅里中富長者

參禪不厭貧。讀書不厭貧。居亂世不厭貧。參禪忘身命。豈厭貧也。讀書忘得失。豈厭貧也。居亂世忘憂慮。豈厭貧也。三者僕實有之。足下之貧。何爲乎來哉。

謝無相長老

師謂我終身蔬食。以代餐薇。暮年自苦。徒爍病骨。有虧壯心。豈足令名哉。仰承慈旨。無乃過屠門而大嚼。抑遵聖人養老之遺規。雞鵝葱蒜。逢着便喫。生老病死。時至卽行。其斯之謂歟。我當再問諸羅什長者。

又

酒以養和。乃反乖和。酒以交歡。乃反失歡。酒以解憂。乃反增憂。再一酩酊。上不知有天。下不知有地。中不知有人。讀馬蹄一篇。知伯樂之失御。讀至樂一篇。知海鳥之眩悲。如此則速營糟邱。吾將終老。是何言歟。我當再一讀陳暄之書。

荅濮道翁

不肖某失訓遺孤。叔殤伯絕。兄夭弟亡。幼肩門戶。長棄室家。愚非甯子。狂似嵇生。郭林宗有言。天之所廢。不可支也。是當輕等鴻毛。何當累及椽筆。敬謝敬謝。

與沈白巖

旋灰屢徙。合璧不停。又將雜花生樹。羣鷺亂飛。飢渴明珠。一日三歲。某十年廟跡桑門。徒慚懷鼠。竊恥支

流謬辱王公心實久銘德詎可諉忽聞有叔敖抵掌管叔流言足類呂梁之川彌同太行之嶺某雖戴有天終懼投杼形體離俗肺腑若狂一聞此語驚悸自失然樂情莫疏知我者其惟足下乎值長公來邸敢託幽沈吐握之餘鑒白素悃使屈子投淵千載有知音文舉被收一言完墮卵先世幸甚友誼幸甚

又

上元左次郎君省視還邸白牋達記室矣想加清豫娛情山水致足樂也其心期遐晤病臥莫從復因便翻敢恃久要再佈腹心希垂注納曩者先人之廬人竊己有不廢一城全壁旋趙深蒙當事燭照之仁夙荷大慈宏引之論古有其人身當其遇舉家焚頂日月無渝某十餘年來但有浮雲勿問家室母東子西兄南弟北或寄居內戚或負笈外家雖藉先人遺業顛沛之餘罄懸壁立嘗思天下之慘莫過孀室嬰兒某既離俗斯近之矣兩歲家中拮据兩婚借影廊廡難析爨火適有意外之虞遽還故址園樓□□典貯無恙母子煢煢偃居前屋至含舊淚載沐新恩日計當事特簡道經屬里待命麾下復聞萋菲之傳雖非齊女雷霆實抱堂下穀觶前對郎君已瀝心血未遲金玉敢置贅疣猶懼先人之言不敢驟越當事託札代申恭伺鈞敕少慰老牛舐犢之愛離鳥故巢之思某溝壑未填神魂未息望足下明教之望足下明教之某頓首懇

謝徐倩

聞仲叔不以口腹累人僕以饕飮累足下雖在層陳之日難酬飽韓之年樽既不空庖稱好道幾忘三句

九日勿慮十人一鄉莫遘御車之間幸追坦腹之懷

又

片紙伸謝想入清塵次兒來聞醺金燕賀不謂知我我命蹇促近比春霜藜糗腹已果然豈能更飫膏液將乖之際相與共憂勉矣吾甥勿奪我素

謝呂悠翁

呼我共食不敢學梁伯鸞知鮑叔之知我也懷古慨今頽然一醉天北之外豈更多人哉

謝唐紫老

古人一飯之德必不忘報薄命之夫未可同語也雲間之行不幾匍匐三泖有泉九峯有月一筐攜來貯谿頭消我窮愁又何如鳴謝

謝戴甥

千人之諾諾不如一士之謬謬信然昨借一言如破重圍不作巾幗中人相視十城之壁不日可完也

謝呂雲老

閱結十年談驚一席爽人耳目移人心胸藜藿賤人重饔厚味潦倒不知則知醉德夢中猶志一絕食德容易報德難常將冷眼世中看何曾說有桑閒士多少人來笑范丹

與通家某

大丈夫出處有常。當伯夷時。伯夷之世也。當柳下惠時。柳下惠之世也。尋常流俗。非所能知。下士聞道。大笑而已。不笑不足以為道也。一席之談。骨肉能幾。而意氣勝於骨肉者。非老姪誰歟。僕十年一死之軀。天性人倫。猶未之失。豈不念孤恤寡。自處不俗不僧。顧情有所亡。志有所存。居家居菴。原無二視。古人養志。使一分之安。稱一分之孝。不在貧富貴賤。利祿厚薄淺深。為奉養也。使僕身名不墜。情志不違。終日藜藿。則終日膏粱。又豈於形跡之上。噉酒哺肉。為奉養也。舉世皆噉酒哺肉之人。此道何足論。老姪必能諸我。而詔我者。

又

古之佯狂遜世者。藏形深山。匿跡異流。或封土屋。或曜雙眸。或抱石投冶。或艾熏不出。而僕高臥市南。谿光作影。時入闌闌。人語喧騰者。有不得已者三焉。巢卵未毀。舐犢未忘。人之常情。我獨何已。一也。薏苡之謗。青蠅之讒。比類之求。苛誅不已。二也。家業蕩夷。簞食靡託。世無謝仁祖。代乏劉荊州。澤雉之謀。亦烏能已。三也。嗚呼。此身不死於十年之前。而死於十年之後。知無益也。若論形跡疏誕。以此見疑。古人亦有行之者矣。豈欺我哉。若欲束身世俗。終為五斗折腰。惟有入西山。蹈東海耳。曾與道翁雲老言之。豈欺老姪哉。飲食可以忘身。不可以忘名。倘值春風秋月。與時消息。而僕能之。

醉後與友人

石季倫嘗與孫季舒酣飲。孫傲慢過度。季倫欲表免之。裴叔則聞而謂之曰。季舒酒狂。四海所知。足下飲

人狂藥責人正禮。不亦乖乎。某久方外。何足戀此。季舒狂請從此斷。季倫飯請從此辭。

荅病人

毋多事。毋勉強。毋好樂。毋妄想。福不可求。禍不可避。凡事隨緣。聽其自然。可以立命。可以延年。捨此外求。人難勝天。置之座右。疾自愈矣。

與沈倩

五倫素睦。一旦相失。迴然一身。形影誰惜。豈不痛哉。但理存乎數。莫可如何。微自遣割。勿爲過毀。庶幾喻釋氏之空華。讀莊生之寓言。差足慰息。僕是同舟共溺之人。共相手援。何能濟哉。

與內戚

弟受景鴻之託。處此位非山濤。處此時非山濤。吾兄共有之。蹉跎八載。善誘靡聞。駕馳失馭。璞屑叩商。豈有覬覦。郭林宗獎勸人倫。謝安石引拂士類。景鴻實賴之。婚姻伊邇。幸與令姪觀。只酌略不敢過札。

荅李同社

魚相造乎淵。人相造乎道。某淹蹇方外。良朋莫遘。愛護如足下。亦復曠懸。秋風數起。蟋蟀久鳴。披襟短褐。促膝常談。寒時繼續。儉歲膏梁。洵足樂也。令姪貺以茗釀。滌穢忘憂。望爲言謝。來額不減。韋誕之懼。自當請見大巫。

辭景鴻相招過歲

廿年破浪及早收帆若更遲回邯鄲學步雖知娛老之念慙深其如老年行藏愈拙謹辭

與夏雪翁

先生儒門知識開悟頑迷運斧文章須憑郢匠嚮往積素負笈蹉跎抱膝一菴未能雞肋先人之祠神游湯沐將有甦睡之鬼而無太乙之藜望賜一言以彰根本形骨鴻毛名教岱嶽所賴不淺

與二勝和尚

杖履兩及弟一走吳一走越旣違語默申款靡從日就月將兄南弟北移我情者不在刺船後也俯思蘭誼寤切玄關一日九迴未嘗彌歇秋蟬數起春庚復鳴恨同弱水難航況是茂陵善病託形蓬下自計爲足引領天池應嗤我拙近聞道攝黃山重聯白社未能酬積別佈專人臨東風而浩歎望玉嶼以懷吟倘不以形跡爲阻空梁有待握袂谿梁解其愁結何如

復二勝和尚

雲山萬重惠問數及心游閩越翻欲培風近爲伏痰流火所攻耳塞目闔手戰足蹉百骸潰散一榻難支老人處歲不過兩觀同堂休兄外希得一觀總由造道未深賦性迂劣昔嵇中散不能繕俗而獨喜鍛鐵卒爲人鄙有負吾兄所望於弟人生猶草木豈不知春花秋實之爲喻哉弟感老人陽和之燠靡從報稱壽塋崇舉義屬子來但家計蕩然內無憑藉外絕交攀徒自剝腸與誰借箸竊承教示天倫之重足欽孝思弟之罪狀益難擢髮更念吾兄追蹤昔士兩躡名山抱光風霽月之體展攬雲握霧之手高山流水世

鮮鍾期。奚若成連子之妙用。刺舟而返。曳數年相隔之裾。老人年介從心。爾我年推耳順。同堂相聚。人生有涯。履道坦坦。好假布帆。引領秋風。此弟千里一言也。慚無黃耳。敬附白眉。風景不同。時地珍攝。

復丹陽陸社長

昔人吐納風流。聽者忘飢。別來葛已易裘。恒如晤對。然味道之言久虛。咀嚼無從。又如儉歲之飢荒也。每欲假布帆。溯練川。抵掌世外。復爲震四之遂泥。世外之屯蹇。詎知足下亦感世閒之浮雲。所際不同。所遇同時。某當俯仰頽靡。而足下盤根錯節。正在於斯。幸自勉勸。以慰天涯。伏承存貺。廿年敗衲。不煥自春。空函附謝。慚負實多。聊待谿梅。佇臨鶴首。

與徐倩

短閣之談。得忘憶乎。孟夫子云。人之異於禽獸者。以其存心也。人孰無心。但偏正不同耳。一存其正。綱常倫理。靡往不是。僕之形跡。久爲人笑。聚塗而言。宿曰何必乃爾。屋下有子。歸之何如。天性一倫。人孰無心。所不忍自棄者。正在此心。所以遲遲我行。遲遲我止。亦不忍明於楮墨。且年已半百。生趣迫盡。殘月曉星。不同落照餘光。在家亦僧。在菴亦俗。不負我志。不易我形。我使忠孝節義。世世子孫有之。有酒食先生饌。聖人非之。原不在利祿奉養也。然立一身。成一名。必多遇合。古人喜黃菊。有晚節之芳。松柏有後凋之歎。僕願一家骨肉。勿謂在家爲家。在菴爲菴。成僕古人之所喜。松柏之歲寒。吾甥其人歟。

古人空函相達。錯會不少。況傳語得無誤乎。人之相知。貴相知心。骨肉之間。能不諒我。僕遽瑗之知時。時自責遺業蕩夷。自度無愧。可以見先人於地下。但陶貞白不能白日飛昇三朝。有浮名爲累耳。以往之輪。不欲更返。莫年牢落。不過餬口。中秋有月。泛笠澤。登虎阜。仰憑魂夢。所不僅也。瑗瑗僕爲塞耳。

與東谿朱子

某善病。不過東谿者。忘歲月。但見羊裘。猶持釣竿耳。棲尚旣同。形契頓闊。黃門之棹。何日以之。向足下還。刻晚唐近體。敝友願以十城償璧。推愛惠施。敬承光彩。

與高瓠翁

杜少陵半生有囊空之歎。僕能追蹤古人。良足愧也。十日高歌。豈類平原。千里老驥。還同魏武。蓋在乎醉心。何曾一箸不足貴也。落帽賦詩。猶堪挂孟萬年齒。拱候。

荅同社

廿年牢落。聊借步兵。以破愁城。實非所嗜。小器易盈。每取沈頓。疾疢未除。遺躬敢毀。熟酒不過升量。雖遭良集。毋渝此盟。乃敢入社。

邀武林章社長

汝南月旦。東山人倫。復見今日。某廿餘年。笑笑方外。空谷絕音。一遇伯樂。如叔敖之有優孟。慷慨激烈。時動唇吻。把晤旣晚。留連日少。谿泉雖涸。菱豆正肥。早望星駕。勿訝范釜中多游魚也。

此前提遺逸孫梅谿先生肩所著也。先生隱於僧，讀其書可以知其志。善書。今天醫道院四字扁，是先生手書。此冊得於舊家，世無副本，寶之。光曾記

此書從友人藏本借鈔，字經三寫，已多譌闕。末有小記，署光曾爲戴君松門、嘉興諸生，以學行受知於阮文達者。孫氏事蹟無可考。文中有戊子諸君子之膏數語，不可曉，必有奪誤。戊子當國朝順治五年，時金聲桓、李成棟、姜壤復叛，於是殷頑若楊崑、周世臣等乘閒搆亂，事發牽連，伏誅者百餘人，疑指此。其言景鴻父、乙酉慷慨盡節，與吳危齋書及其園中紀詠讞語頗末，疑爲徐似之尙書石麒麟子名爾穀，被執下獄，抗詞不屈，與錢彥林、夏存古同日受戮。妻孫氏自沈殉夫，證以生爲余戚語近之，然不敢信也。明社旣屋，遺黎託于緇流，恆詭名姓，卷中所存，今皆無可復問。文字雖拙，尙無悖妄語，諒其心苦，取而存之，思悲翁記。

